

e teie mau ohipa, e e rave rahi atu â, e faa'ite i te here.

Ua ti'aturi o Dale Carnegie, taata papa'i buka tu'iroo no Marite e, te vai ra i roto i te taata tata'itahi te « mana no te haamaraa i te numera taatoa o te oaoa o [te] ao [nei]... na roto i te parauraa i te tahi mau parau haamauuru ma te aau tae mau i te hoê taata otahi e aore râ, tei paruparu te mana'o ». Ua parau oia e, « Peneia'e ananahi e mo'ehia ia outou te mau parau maitai ta outou i parau i teie mahana, are'a te taata i farii i te reira ra, e faaherehere oia i te reira i roto i to'na oraraa taatoa ». ¹²

Te ti'aturi nei au e, mai teie atu taime, i teie iho mahana, e faa'ite tatou i te here i te mau tamarii atoa a te Atua, e melo anei no to tatou utua-fare, e mau hoa anei no tatou, e taata mâtauhia anei, e aore râ, e taata ê roa anei. Ia ti'a mai tatou i te mau po'ipo'i atoa, e faaoti tatou ia paraparau ma te here e te maitai i te mau huru taata atoa e farereihia e tatou.

E te mau taea'e e te mau tuahine, eita e roaa ia tatou ia feruri i te here o te Atua ia tatou. No taua here ra i tonono mai ai Oia i Ta'na Tamaiti, tei here ia tatou e ua tae roa i te horo'a i To'na ora no tatou, ia roaa ia tatou te ora mure ore. Ia rahi ana'e to tatou haroaroaraa i teie horo'a faito ore, e i to tatou aau i te here i to tatou Metua Mure Ore, i to tatou Faaora, e i te mau taata atoa. Te pure nei au ma te tuutuu ore ia tupu mau te reira, na roto i te i'oa mo'a o Iesu Mesia ra, amene. ■

TE MAU NOTA

1. Mataio 22:36–39.
2. Mareko 12:31.
3. I Ioane 4:21.
4. Luka 23:34.
5. E taata papa'i i roto Richard L. Evans, « The Quality of Mata a'ia'i », *Improvement Era*, Me 1960, 340.
6. *The Teachings of Spencer W. Kimball*, ed. Edward L. Kimball (1982), 483.
7. Hi'o « Injured Boy Flown to Safety », *Daily Sitka Sentinel* (Alaska), 22 no atopa 1981.
8. Moroni 7:47.
9. Gordon B. Hinckley, « Let Love Be the Lodestar of Your Life », *Ensign*, Me 1989, 67.
10. Hi'o Te Parau Haapiiraa e te Mau Parau Fafau 121:43.
11. « Maud Muller », i roto *The Complete Poetical Works of John Greenleaf Whittier* (1878), 206 ; reta tei faahuru-ê-hia.
12. Dale Carnegie, i roto, ei hi'oraa, Larry Chang, *Wisdom for the Soul* (2006), 54.



Na te peresideni Boyd K. Packer

Peresideni no te Pūpū no te Tino Ahuru Ma Piti Aposetolo

Te ite

Te hinaaro nei au ia faa'ite atu ia outou i teie mau parau mau, te mau mea faufaa roa a'e e tano ia ite.

Erave'a ihoa ta te tau tama'i e aore râ ta te tau papû ore no te faarahi i to tatou tutonuraa i ni'a i te mau ohipa faufaa a'e.

I te tau no te Tama'i Rahi II o te ao nei tei roto vau i te huehue pae varua. Ua faaru'e au i to'u fenua ai'a ra o Brigham City, Utah, e te hoê omotu iteraa papû noa, e tei roto i to'u aau te hinaaro ia itehia mai te tahi mea hau atu. Te tahi noa maa hepetoma toe, tei ni'a ta matou pupu i te tahua aroraa. Tei te motu no Shima matou i te parahiraa, i te pae apato'eruu no Okinawa, i te fenua Tapone, te tafifi ra vau i te feaa e te papû ore. Ua hinaaro vau i to'u iho iteraa papû no te evanelia. Ua hinaaro vau ia *ite* !

I tera pô, topa ore te taoto, haere a'era vau i rapae i te fare ie e tomo atura i roto i te hoê pâ, e mau tura mori noa tei faa'ihia i te one e tei apapahia e teitei roa mai ei paruru. Aita e tapo'i na ni'a mai, e no reira, ua nee au i roto, e ua hi'o i ni'a i te ra'i i te mau feti'a rau i roto i te reva, e ua tuturi atura vau i raro no te pure.

I ropu noa i ta'u parau teie mea i te tupuraa mai. Aita e nehenehe ta'u e faataa ia outou i te mea i tupu, noa'tu â to'u hinaaro. E mea hau atu te reira i to'u mana ia parau, e mea papû

râ, i teie mahana mai i tera ra po a 65 matahiti i teie nei. Ua ite au e, e ohipa taa ê roa te reira, e hoê faa'iteraa no'u ana'e iho e ti'arâ. Are'a, i ite atura vau no'u iho nei. I *ite* atura vau ma te papû roa, no te mea ua horo'ahia mai te reira ia'u. Ua faaea rii au, e ua nee ihora vau i rapae i tera pâ e ua haere e aore râ e ua rererere atu vau i to'u ro'i. I te toe'a o tera po, tei roto noa vau i te oaoa e te faahiahia rahi.

Aita vau e mana'o ra e mea taa ê au, ua mana'o râ vau e, mai te peu ua tupu te reira no'u, e tupu atoa ia no te tahi noa'tu taata. Te vai noa nei teie ti'aturiraa. I te mau matahiti no muri iho, ua tae mai te haro'aro'a e, ua riro te reira huru ohipa i te hoê maramarama e pee atu e te hoê atoa ho'i hopoi'a e amo atu.

Te hinaaro nei au ia faa'ite atu ia outou i teie mau parau mau, te mau mea faufaa roa a'e e tano ia ite, e mau mea ho'i ta'u i apo mai e o ta'u i ite fatata a 90 matahiti oraraa e a 50 matahiti, ei tino i roto i te hui mana faatere rahi. Te rahiraa o te mau mea ta'u i apo mai, e ô ia te reira ratou i roto i te mau mea eita e nehenehe e haapii atu, e haapii mai râ.

Ia au i te mau mea faufaa rahi atoa, e tae mai te ite no te mau mea faufaa



e ta'na vahine e ta'na mau tamarii ei utuafare oaoa.

Te feia eita e faaipoiipo e aore râ eita e fanau i te tamarii, eita ia ratou e tapu-ê-hia i te mau haamaitairaa mure ore ta ratou i imi noa na, noa'tu e, i teie nei, aita e noaa ra ia ratou. Eita tatou e ite tamau noa nahea ra e aore râ a fea ra te mau haamaitairaa e faaura mai ai, eita râ te parau fafau no te faarahiraa mure ore e pato'ihia i te taata faaroo tei rave e tei haapa'o i te mau fafauraa mo'a.

E riro ta outou mau hiaai hohonu e te roimata o ta outou mau taparuraa i te haaputapu i te aau o te Metua e o te Tamaiti. Na Raua e horo'a mai ia outou i te haapapûraa e, e riro to outou oraraa i te î hope, e aita hoê haamaitairaa faufaa e haamo'ehia no outou.

Ei tavini na te Fatu, na roto i teie toro'a tei faatoro'ahia i ni'a ia'u, te horo'a nei au i te feia tei roto i teie huru oraraa i te parau fafau e, aore mea faufaa no to outou faaoraraa e to outou faateiteiraa eita e tae atu ia outou ia tae i te taime ti'a. E faa'ihia te rima î ore e e faaorahia te mau iui o te aau pêpê i te mau moemoea e te mau hiaai tei haru-ê-hia.

Te tahi faahou parau mau ta'u i apo mai, oia ho'i, e parau mau te Varua Maitai. O Oia te tino toru o te Atuaraa. Ta'na misioni, o te haapapûraa ia i te parau mau e te parau ti'a. Ua rau te rave'a Na'na no te faa'ite mai Ia'na, mai te mana'o hau e te aau hau. E ti'a atoa Ia'na ia faatae mai i te tamahana-hana, te arata'iraa e te faatitûfaiforaraa i te taime tano. E vai noa te hoaraa o te Varua Maitai i te roaraa o to tatou oraraa na roto i te oraraa parau ti'a.

E ravehia te horo'araa i te Varua Maitai na roto i te hoê oro'a o te evanelia. E tuu te hoê taata tei horo'ahia i te haamanaraa i to'na pu'e rima i ni'a i te upoo o te melo apî o te Ekalesia e e parau oia i teie mau parau : « A farii mai i te Varua Maitai ».

E ere na teie oro'a noa e faataui ia tatou i te hoê maitai rahi a'e, mai te peu râ e faaroo e e pee tatou i te mau faaûruraa, e riro tatou i te farii i te haamaitairaa o te Varua Maitai. E nehenehe i te tamaiti e i te tamahine tata'itahi a to tatou Metua i te Ao ra

mure ore na roto ana'e i te pure e te feruriruri-maite-raa o te hoê taata. E ia apitihia te reira i te haapaeraa maa e te tuatapaparaa papa'iraa mo'a, e tae mai ia te mau mana'o e te mau heheuraa e te mau muhumuhu a te Varua Maitai. Na te reira e horo'a mai i te mau arata'iraa no ô mai i te ra'i, a haapii ai tatou i te faaue na ni'a i te faaue.

Teie te parau fafau a te heheuraa e, « Te mau parau tumu no te ite o te noaa mai ia tatou i roto i teie oraraa nei, e ti'a ia te reira e o tatou atoa i roto i te ti'a-faahou-raa » e « te... noaaraa i te ite e i te maramarama... [e noaa ia] na roto i [te] itoitoe e [te] haapa'o » (PH&PF 130:18–19).

Te hoê o te mau parau mau mure ore ta'u i apo mai, oia ho'i, te ora nei

te Atua. O Oia to tatou Metua. O tatou Ta'na mau tamarii. « Te ti'aturi nei matou i te Atua, te Metua Mure Ore, e i Ta'na Tamaiti ia Iesu Mesia, e i te Varua Maitai ho'i (Te mau Hiro'a Faaroo 1:1).

I roto i te mau ti'araa atoa tei ti'a Ia'na ia faa'ohipa, ua ma'iti Oia ia piihia Oia te « Metua ». Ua faaue te Faaora, « E na ô outou ia pure : E to matou Metua i te ao ra » (3 Nephi 13:9; hi'o atoa Mataio 6:9). Te faa'ohiparaa Oia i te i'oa « Metua », e haapiiraa ia no tatou paatoa a maramarama ai tatou no ni'a i te mea faufaa a'e i roto i te oraraa.

E faufaa taa ê e te mo'a to te ti'araa metua, e ia au i to tatou faaroo, e riro mai te reira ei haamaitairaa mure ore. Te ohipa rahi roa a'e i roto i te Ekalesia, o te faarioraraa ia i te hoê tane



Oire no Mehiko, Mehiko

ia ite i te papûraa o te parau fafau a Moroni : « Na roto i te mana o te Varua maitai e ite ai outou i te *parau mau* o te mau mea atoa ra » (Moroni 10:5 ; reta tei faahuru-ê-hia).

Te parau mau faahiahia hope ta'u i apî mai i roto i to'u oraraa, o to'u ia ite no te Fatu ra ia Iesu Mesia.

I ni'a roa e i roto i te mau mea atoa ta tatou e rave nei, e te tutau ho'i no te mau heheuraa, o te i'oa ia o te Fatu, oia ho'i te haamanaraa no te raveraa i te ohipa i roto i te Ekalesia. Te mau pure atoa e pûpûhia nei, noa'tu â e tamarii rii, e faaoti te reira na roto i te i'oa o Iesu Mesia. Te mau haamaitairaa atoa, te mau oro'a atoa, te mau faatoro'araa atoa, te mau ohipa mana atoa, te ravehia nei na roto i te i'oa o Iesu Mesia. E Ekalesia teie Na'na, e ua topahia te i'oa No'na—Te Ekalesia a Iesu Mesia i te Feia Mo'a i te Mau Mahana Hopea Nei (hi'o PH&PF 115:4).

E ohipa rahi tei tupu i roto i te Buka a Moromona, « te pure ra hoi [te mau ati Nephi] i te Metua i [te i'oa ra o te Fatu] ». Ua fa mai te Fatu ia ratou ma te ui mai :

« Eaha to outou hinaaro ia'u ?

« E ua na ô atura ratou ia'na, E te Fatu, te hinaaro nei matou ia faa'ite mai oe i te i'oa ta matou e ma'iri i ni'a i teie nei ekalesia ; tei roto ho'i i te feia te mârô i taua vahi ra.

« E ua na ô maira te Fatu ia ratou, Amene, amene, e ui atu vau, eaha taua feia nei e amuamu ai e e mârô ai ho'i i taua mea ra ?

« Aita anei ratou i tai'o i te parau i papa'ihia ra, te na ô mai nei e, Ia rave outou i te i'oa o te Mesia e ti'a'i, o to'u ia i'oa ? Ei taua i'oa nei outou e parauhia'i i te mahana hopea ra ;

« E te rave i to'u ra i'oa i ni'a ia'na iho e te tamau â e tae i te hopea ra, e ora ia...

« E tena na, te mau mea atoa ta outou e rave, na outou ia e rave i to'u

ra i'oa ; no reira e parauhia'i te ekalesia i to'u ra i'oa ; e e pure atu outou i te Metua i to'u i'oa, ia haamaitai oia i te ekalesia no'u ra » (3 Nephi 27:2-7).

O To'na i'oa, Iesu Mesia, « aita'tu ho'i e i'oa i faa'itehia mai i te taata i raro a'e i teie nei ra i e ora'i tatou nei » (Te Ohipa 4:12).

I roto i te Ekalesia, ua ite tatou o vai Oia : o Iesu Mesia te Tamaiti a te Atua. O te Fanau Tahī a te Metua. O Oia tei taparahi-pohe-hia e o tei ora faahou mai. O Oia to tatou Arai i mua i te Metua. « A haamana'o, e ia haamau i to [tatou] niu i ni'a i te papa ra o to tatou Ora, o te Mesia ia, o te Tamaiti a te Atua ho'i » (Helamana 5:12). O Oia te tutau e tape'a nei ia tatou e o te paruru nei ia tatou e to tatou utuafare na roto i te mau vero o te oraraa.

I te mau sabati atoa, na te ao atoa nei, e putuputu te mau amuiraa i tera e tera fenua e tera e tera reo, e haamaitaihia te oro'a mo'a i te hoê â mau parau. E rave tatou i ni'a ia tatou i te i'oa o te Mesia ma te haamana'o noa Ia'na. Ua nene'ihia te reira i ni'a ia tatou.

Ua parau te peropheta Nephi, « Te paraparau nei tatou i te Mesia, e te oaoa nei tatou i te Mesia, e te a'o nei tatou i te parau a te Mesia, e te tohu nei ho'i tatou i te Mesia, e te papa'i nei ho'i tatou i ta tatou mau tohu, ia ite ta tatou mau tamarii i te tumu e hi'ohia'tu e ratou no te matararaa i ta ratou mau hara » (2 Nephi 25:26).

Titauhia ia tatou paatoa ia roaa to tatou iho iteraa papû no te Fatu ra ia Iesu Mesia. Ei reira tatou e faa'ite atu ai i to tatou iteraa papû i to tatou utuafare e ia vetahi ê.

I roto i teie mau mea atoa, e haamana'o na tatou e, te vai ra te hoê enemi o te imi nei i te faaore i te ohipa a te Fatu. Titauhia ia tatou ia ma'iti o vai te pee atu. To tatou parururaa tei te huru ia ta tatou iho faaotiraa ia pee i te Faaora, ma te haapapû e, tei To'na pae tatou i te haapa'o-maitai-raa.

I roto i te Faufaa Apî, te faati'a nei Ioane e, te vai ra te tahi mau taata tei ore i fafau ia ratou i te Faaora e i Ta'na mau haapiiraa e « faarue maira te hoê pae rahi pipi a'na i reira ra, aita maira i pee faahou ia'na.

« Ua parau maira Iesu i te ahuru ma piti ra, E haere atoa anei outou ?

« Ua parau atura Simona Petero ia'na, E te Fatu, e haere ti'a matou ia vai ra ? tei ia oe ho'i te parau o te ora mure ore ra.

« Ua faaroo a'enei ho'i matou, e ua ite ho'i matou e, o oe te Mesia, te Tamaiti a te Atua ora ra » (Ioane 6:66–69).

Ua noaa mai ia Petero te mea ta te feia pee atoa i te Faaora e nehenehe e apo mai. No te riro mai ei taata pûpû ia'na iho ia Iesu Mesia ma te haapa'o maitai, e ti'a ia tatou ia farii Ia'na ei Taraehara e ia rave i te mea atoa i roto i to tatou mana no te ora ia au i Ta'na mau haapiiraa.

Ua hope e rave rahi matahiti ta'u i ora na e ta'u i haapii e ta'u i tavini, ua hope tau milioni maile ta'u i ratere na te ao atoa nei, i roto i te mau mea atoa ta'u i ite, hoê parau mau rahi ta'u e hinaaro nei ia faa'ite atu. O to'u ia ite no te Faaora, o Iesu Mesia.

Ua papa'i Iosepha Semita e o Sidene Rigidoni i teie parau i muri mai i te hoê ohipa mo'a tei tupu :

« E i teie nei, i muri mai i te mau parau faa'ite e rave rahi o tei horo'ahia no'na ra, o teie ho'i te parau faa'iteraa hopea roa ra, o ta maua e faa'ite atu nei no'na ra ; Oia ho'i te ora nei oia !

« No te mea ua ite mata'tura maua ia'na » (PH&PF 76:22–23).

Ta raua mau parau, o ta'u ia mau parau.

Te ti'aturi nei *au*, e ua papû roa ho'i *ia'u* e, o Iesu te Mesia, te Tamaiti a te Atua ora. Te ora nei Oia. O Oia te Fanau Tahī a te Metua, e « na roto ia'na, e no'na ho'i, te mau ao e hamanihia nei e i hamanihia na ho'i, e te mau taata ho'i no reira e mau tamaiti e e mau tamahine fanau ho'i ratou no te Atua ra » (PH&PF 76:24).

Te faa'ite nei au i to'u iteraa papû e, te ora nei te Faaora. Ua *ite* au i te Fatu. E ite au No'na. Ua ite au i Ta'na tusia rahi e To'na here mure ore no te mau tamarii atoa a te Metua i te Ao ra. Te horo'a'tu nei au i teie nei ite taa ê no'u, ma te haehaa, e ma te papû hope atoa râ, na roto i te i'oa o te Iesu Mesia, amene. ■



Na Elder William R. Walker
No te Hitu Ahuru

Ia ora ma te mau maite i te faaroo

E haamaitai-rahi-hia tatou tata'itahi mai te mea e, e ite tatou i te mau aamu o te faaroo e te tusia tei arata'i i to tatou mau hui metua ia tomo mai i roto i te Ekalesia a te Fatu

E mea au roa na'u te aamu o te Ekalesia. Peneia'e, mai ia outou e rave rahi, te haapuaihia nei to'u faaroo ia ite ana'e au i te faaroo faahiahia o to tatou mau hui metua tei farii i te evanelia e ua mau maite i te faaroo.

Hoê ava'e i ma'iri a'enei, 12 000 feia apî nehenehe no te mataeinaa hiero no Gilbert Arizona, tei faahanahana i te otiraa to ratou hiero apî na roto i te tahi mau ha'uti nehenehe, tapa'o faa'ite no to ratou hinaaro ia ora ma te parau ti'a. Te parau tumu no ta ratou faahanahanaraa « Ia ora ma te mau maite i te faaroo ».

E mea ti'a i te Feia Mo'a tata'itahi no te mau Mahana Hopea nei, ia fafau « ia ora ma te mau maite i te faaroo », mai tei ravehia e taua mau feia apî faaroo no Arizona ra.

Te na ô ra te mau parau no te himene e, « Mau maite i te faaroo ua poihere to tatou hui metua » (« True to the Faith », *Hymns*, n°254).

E nehenehe ta tatou e parau atoa e, « Mau maite i te faaroo ua poihere to tatou mau metua ruau ».

Ua uiui to'u mana'o e, ua ite anei teie feia apî oaoa no Arizona i to ratou iho aamu no te Ekalesia—ua ite anei

ratou i te aamu no te huru te riroraa mai *to ratou* utufare ei melo no te Ekalesia. E ohipa faahiahia roa ia ahiri e, ua ite te Feia Mo'a atoa no te mau Mahana Hopea nei i te mau aamu faa-fariuraa o to ratou mau hui metua.

Noa'tu e, e huaai outou no te mau melo matamua o te Ekalesia e aore râ, e ere, ua riro ia te faufaa ai'a o te faaroo e o te tusia o te mau Momoni matamua, ei faufaa ai'a no outou. E faufaa ai'a hanahana teie na Te Ekalesia a Iesu Mesia i te Feia Mo'a i te Mau Mahana Hopea Nei.

Hoê o te mau pene nehenehe roa a'e i roto i te aamu o te Ekalesia ua tupu ia i te taima a haapii ai o Wilford Woodruff, apotesolo na te Fatu, i te evanelia a Iesu Mesia i faaho'ihia mai, i te fenua Peretane i te matahiti 1840–10 noa matahiti i muri a'e i te faati'araahia te Ekalesia.

Ua faatumu o Wiford Woodruff e te tahi atu mau aposetolo i ta ratou ohipa i roto ia Liverpool e ia Preston, i Peretane, ma te manuia rahi. Ua pure tamau noa o Elder Woodruff, tei riro mai ei Peresideni no te Ekalesia, i te Atua ia arata'i ia'na i roto i teie ohipa faufaa. Na roto i ta'na mau pure ua